

REGIONAL NEWS BULLETIN

Date – 26/10/2025

Time - 18:30 Hrs

HEADLINES (EVENING)

1. Chief Minister Pu Lalduhoma'n Mizoram chu Lakshadweep dawta eiruk tlem berna state a nih thu leh hei hi thil chhinchhiah tlak leh chhuanawm tak a nih thu a sawi.
2. Gauhati High Court chuan Kawnpui leh Sairang inkar national highway-306 siamtu J. Infratech chu an hna-thawh chin leh kawng an siam zawh theih hun tur thehlut turin a hriattir.
3. Sorkar laipuiin GST rate thar a duanah damdawi man bakah damlote mamawh hmanraw hrang hrang man nasa takin a tlahniam.
4. Prime Minister Narendra Modi-a'n mipuiin GST Bachat Utsav an phurpui chu a lawmawm tak zet a ni, a ti.

<><><>

VIGILANCE WEEK

Chief Minister Pu Lalduhoma chuan Mizoram chu Lakshadweep dawta eirukna tlem berna state a nih thu leh hei hi thil chhinchhiah tlak leh chhuanawm tak a nih thu a sawi.

Naktuk Thawhtanni atanga Pathianni thlenga hman tur Vigilance Week, 2025 puala a thuchahah he thu hi sawiin Chief Minister chuan Vigilance Week chu kumtin Sardar Vallabhbhai Patel-a piancham, October ni 31 huamchhunga hman thin ani ati a, hrui khat vuana eirukna leh hlemhletna do tura mipuite zirtir na'na hman thin a nih thu sawiin, Mizoram sorkar Vigilance department pawhin kum 2018 atangin kumtin he hapta hi a hmang thin thu a sawi a. Chief Minister chuan eirukna chu hmasawna daltu, mipuiten an chanvo dik an chan theihlohna bul, Pathian huat zawng a nih thu a sawi a. Mahni chhungkua theuhah eirukna do hna huai taka kalpui tur leh eirukna sum atanga lei thil reng reng duh lo ngam turin mipuite a ngen a ni.

Pu Lalduhoma chuan eirukna laka fihlim theihna turin sorkar laipuiin Prevention of Corruption Act, 1988 a siam thu leh sorkar hnathawkte chu CSS Conduct Rules, 1964 danin a phuar thu a sawi a. Prevention of Corruption Act, 1988 hnuai-ah Anti Corruption Bureau (ACB) leh Mizoram Lokayukta din a ni tawh tih sawiin kumin chhungin eirukna leh a kaihhnawih thilah ACB chu preliminary inquiry tih phalna 10 pek a nih tawh thu leh regular case siam phalna 5 pek an nih tawh thu a sawi a. Transparency International in Corruption hluar lam tehna Corruption Perception Index, 2024 ah India chu ram 180 zingah 96 na a, a dah thu leh kum 2023 aiin pathumin hma a sawn thu a sawi a. Transparency International leh NITI Aayog data behchhana CMS India Corruption Study in a hmuhchhuah danin Mizoram chu Lakshadweep dawta eirukna tlem berna state a nih thu leh thil chhinchhiah tlak leh chhuanawm tak a nih thu a sawi bawk.

<><><>

CAG: EIBTC

Comptroller and Auditor General of India (CAG) chuan an report thar berah Mizoram sorkarin cheng vaibelchhe 4 leh nuai 39 senga Aizawl Zuangtui Venga Export Import Business Training Centre (EIBTC) a din chungchang chu na takin a sawisel a, CAG chuan EIBTC chu heti zat pawisa seng tawh si a, kum 10 liam hnu pawha hna thawh zawh a la ni lo chu thil fel lo tak a ni, a ti. He hmasawna hna atan hian Ministry of Commerce & Industry ruahmanna hnuai-ah Chief Secretary kaihhruai State Level Export Promotion Committee (SLEPC) chuan kum 2010 khan project an siam a. He hmunpui din tur hi mahni kutkawiha eizawng leh zirlaite'n thil siam lakluh leh thawh chhuah an zirna hmun tur atana ruahman a ni a, thil zawrh leh hralh dan phung leh zawrh tur thilte changkang zawnga ruahman a, Mizoram dinhmun chawikan chu a tum

ber a ni. He tih lai hian sum hman dan endiktute chuan thil felhlel lian tham tak tak an hmuchhuak a ni.

CAG Report-in a tarlan danin Export Promotional Industrial Park Authority (EPIPA) project director chuan kum 2021 June thla khan General Financial Rules 2005 rule 150-na bawhchhia-in tender chhuah lovin architectural consultant a ruat a. A hnu ni 2 chhung leka an consultant ruat chuan cheng vaibelchhe 6 leh nuai 25 senna tur ruahmanna (concept note) a siam peih a, hetah hian consultancy fee cheng nuai 30 a tel a. A hna zawh hun tur engmah bithliah a awm lo ani. EIBTC din hna hi SLEPC-in cheng vaibelchhe 4 leh nuai 39 a pek hmangin kum 2012 November thla khan tan a ni a. Kum 2016 khan sum pek chhuah hi hman ral vek a ni tawh chungin hna thawh tur za zela 70 chauh thawh hman a ni.

<><><>

MTDA

Gauhati High Court chuan Kawnpui leh Sairang inkar national highway 306 siamtu NHIDCL hnuaia contractor J. Infratech chu an hna-thawh chin leh kawng an siam zawh theih hun tur October ni 31 ral hma a affidavit hmanga thehlut turin a hriattir.

Kawnpui leh Khamrang inkar National Highway-306 kawngpui chhia chungchangah hian Mizoram Truck Drivers’ Association (MTDA) chuan Gauhati High Court Aizawl Bench-ah public interest litigation (PIL) an thehlut a, hei hi judge pahnih thutna bench-in chuan Zirtawpni khan a ngaihtuah a ni . MTDA khinna chungchang-ah hian Gauhati High Court chuan NH-306 enkawltu NHIDCL-in kawng siam tura hna a pek J. Infratech chu thubuaiah hian a hnûk lut (implead) a. Hna an thawh tawh chin leh kawng an siam zawh theih hun tur October ni 31 hma ngeiin Court-ah affidavit hmanga thehlut turin a hriattir a ni.

J. Infratech hian sawifiahna affidavit an thehlut loh chuan Court-ah NHIDCL hotute an inlan a tul thu a tarlang a; thubuai ngaihtuah leh hun atan ,November ni 6 a ruat bawk a ni.

Gauhati High Court judge Justice Marly Vankung leh Justice Kaushik Goswami te thutna bench chuan July ni 18 khan MTDA aiawha Pu Jordan Rohmingthanga PIL thehlut chu a lo pawm tawh a. MTDA hian National Highway-306 leh 06 kawng chhe lutuk chungchangah hian Ministry of Road Transport & Highways, NHIDCL, Mizoram sorkar leh PWD te a khing a. He lai kawngpui hi Mizoram chaklakna ber a nih thu leh truck khalhtute chu kawng chhe tuartu ber an nih thu an tarlang a Mizoram mipui mamawh chawh luhna ber kawngpui chhe lutuk chu Mizoram pumin an tawrh thu an tarlang bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

GST 2.0

Sorkar laipuiin GST rate thar a duanah damdawi man bakah damlote mamawh hmanraw hrang hrang man nasa takin a tlahniam.

Mizorama damdawi leh a kaihnawih hmanraw zuartu Genesis Enterprise chuan Akashvani Aizawl zawhna chhangin damdawi man leh damlo enkawlina hmanraw hrang hrang tam zawkah chuan khawl thenkhat GST rate zaa 18 ni thin leh damdawi zaa 12 ni thin chu zaa 5-ah a tlahniam vek thu an sawi a. Eng emaw bik te, rate hlui la ring tlang a awm na a, a tam zawk chu a tlawm nghal vek thu an sawi a ni.

Damdawi leh a kaihnawih hmanraw man tlahniam chu damdawi zuar chhawng tute tan pawh a hlawk thu sawiin a hlawkpui ber tur chu a leitu mipuite an nih thu Genesis Enterprise neitute chuan an sawi a ni. Byte of Pu Malsawmzuala, Genesis Enterprise

<><><>

STUDENT AID FUND

MZP President Dr C. Lalremruata chuan zirlai harsate tanpuina tur Student Aid Fund siam an tum thu a sawi.

Akashvani Aizawl-in a kawmna-ah he thu hi sawiin Dr.C. Lalremruata chuan tuna an term tharah hmachhawp lian tak, zirlai harsa te harsatna sutkianna tur Student Aid Fund dan an duan mek thu a sawi a. He sum tlingkhawm hi zirlai harsa, hostel fee leh thlatin fee nei lote pawhin an hman theih tur a nih dawn thu a sawi a. Fee pek theih loh avanga school hrang hranga exam phal loh te a thlen thin thu leh marksheet pekchhuah lohte pawh a awm thintih sawiin, heng zirlai harsa te tanpuina tur hian Student Aid Fund hi siam ani dawn a ni ati.

<><><>

MANN KI BAAT

Prime Minister Narendra Modi-a’n mipuiin GST Bachat Utsav an phurpui chu lawmawm a tih thu vawiina Akashvani-a Mann Ki Baat hun a hmannaah sawiin sakhaw hun pawimawh lawm laia ramchhung thil siam chhuahte leitu, nasa taka an pung chho chu a lawmawm tak zet a ni, a ti.

Prime Minister chuan Chhath Kut hmangtu zawng zawng, a bikin Bihar, Jharkhand leh Purvanchal mipuite hnenah duhsakna chibai a hlan a. India mi tawh phawt chuan Operation Sindoor hlawhtlinna an chhuang tih sawiin Maoist-ho hluarna hmunah te pawh lawmna khawnvar chhit a ni, a ti a, Maoist-te chu an fate hmalam hun tichhe thei anih avangin mitinin nuaibo an duh a ni, a ti bawk.

<><><>